

第十一章 歷史地理

張其昀

遵義爲黔北高原之雄鎮，居筑渝大道之中心，北倚婁山，南臨烏江。婁山自東北走向西南，山勢巍峨，高峯插雲，海拔自一千五百至一千七百公尺，相對高度亦逾五百公尺，爲赤水與烏江之分水嶺。自婁山北行，至四川盆地之邊緣，峯嶺迭起，在涼風垭花秋坪附近曰蒙山，在松坎附近曰堯龍山，均爲平行之背斜層，其高度亦相埒。自重慶南至遵義，公路須穿越三大背斜，崎嶇險阻，行旅苦之。蓋黔北高原曾經強烈之褶皺，背斜成山，向斜成谷。遵義境內，北起婁山，南至烏江，長崗寬谷，起伏映帶。例如自遵義南至烏江渡一段，公路穿行於一向斜谷中，其地勢之坦蕩，人烟之稠密，爲川黔大道沿綫所罕見。馳驅往來，甚難想像婁山之高聳與烏江之深危。此類寬谷，稱爲平壩，土壤肥美，阡陌相連，農作之精密程度，間可與江南媲美。或因地層局部隆起，及轉折閉鎖，因而形成一種小型盆地，遵義卽位於盆地之中，海拔八百三十公尺，邱陵繞郭，利於設防，湘江濛洞，給水亦便。湘江源於婁山主峯之金頂山（一七〇〇公尺），穿越遵義新舊二城之間，紆迴東南流而入烏江。烏江爲貴州第一大川，流向與婁山平行，沿流而下可達四川涪陵。在遵義境內之烏江渡，谷底海拔僅六百公尺，其上兩崖峭立至四百公尺以上，流急灘險，不通舟楫。烏江渡北至婁山關相距百里之遙，峽谷之深邃堪與山勢之嵯峨相對稱。遵義之氣候最以濕潤著稱，全年雲量多，日照鮮，雲幕低垂，又加相對濕度大，故少晴爽之快。惟地處高原，夏無酷暑，冬鮮嚴寒。全年雨量一千公厘，集中於夏季，作物年可兩熟。遵義之天時與地利影響於人文發展者至爲顯著。因其外有天險之隔，內據山林平壩之鏡，「夜郎自大」乃由於此。夜郎屬保保族，與今西康之夷族爲同種。漢唐盛時雖置郡縣，實則僅屬羈縻，自晚唐以迄明代，土酋楊氏建國於此，歷八百餘年之久。但自明季克服以後，四川及長江中下游各省移民墾殖，農業發達，人文興起，蔚爲黔北首善之區。清中葉以後，邑人鄭珍、莫友芝、黎庶昌諸先生，昌明學術，推爲西南鉅儒，彬彬稱盛矣。抗戰期間，遵義爲後方重鎮之一，人文與物力輻輳交流，氣象一新，遠非昔比。茲將二千年來遵義發展之歷史，分爲九期，略述如后：

（一）夜郎期 遵義古屬夜郎，近人從語言學之研究證明夜郎與保保爲同族。（註一）保保一作羅羅，屬於中國西南邊地民族，爲古代西南夷之一支。其族自稱聶素（Nosu），漢漢語時自稱爲夷家。保保語言屬藏緬語羣，與西藏語爲同系，

其生活亦與藏族接近，放牧高山，不耕水田，家畜有馬牛羊，披黑氈，居板屋，勇敢善戰，信巫教，有文字。此族現以西康省東南部大涼山區域為根據地，居於山中者漢化程度甚淺。自大涼山向外行，川黔滇三省邊境，均尙有其聚落。古時川境瀘敘江南一帶，黔北烏江及赤水流域，以迄滇東北盤江上游，統稱夜郎，其中心當在今黔西安順附近（註二）。交通情形，於一地之開發，至為重要。戰國時楚頃襄王二十二年（元前二七七）遣將莊躡循沅水伐夜郎，至沅水上游，以水急灘多，不能通航，乃舍舟登陸，穿越夜郎而通昆明。漢武帝元光五年（元前一三〇年）從北面征夜郎，其路線疑當為敘昆鐵路所經之地，今桐梓花秋坪附近曰蒙嶺，松坎河上流有蒙渡，相傳為唐蒙發巴蜀卒治道處，雖未必可信據，但今黔蜀邊界綦江桐梓一段之山道，當已為漢人蹤跡之所至。史稱漢通西南夷以繒帛為媒介，非純恃兵力。元鼎六年（元前一一年），夜郎侯入朝長安，武帝封為夜郎王，此為黔省漢化之始。

（二）牂牁期 自夜郎隸漢版圖，建為牂牁郡，（以牂牁江得名，即今之北盤江），時在元鼎六年。下設十七縣，其一曰牂縣，（建縣在牂牁建郡之前，其初屬犍為郡）縣治所在有桐梓遵義二說，雖未能確考，要當包有今之遵義縣境。漢書地理志不狼山暨水所出，按婁狼雙聲字，不狼山即縣北百里之婁山，暨水係婁山北麓之芙蓉江（東北流至四川彭水縣江口鎮入烏江）。前漢武帝時有從司馬相如學賦之威覽（字長通），後漢桓帝時有從許慎受經書之尹珍（字道真），均稱牂牁名士，為華化南漸之徵。（威覽籍貫未詳，尹珍無斂人，今獨山都勻一帶，雖與遵義無涉，但為黔省漢化之始，故實為旁證）然自兩漢以迄隋唐，其地雖設郡縣，大抵以夷治夷，因其故俗，羈縻勿絕。雖漢人有仕宦經商而留居斯土者，惟為數蓋渺，渺無可稽。

（三）播州期 唐之播州始建於貞觀九年（西元六三五年），初名耶州，十三年改名播州。州治在今綏陽縣城左右，位於婁山南麓。西南有遵義縣，亦其轄境。（即隋之牂牁縣，遵義之名始於貞觀十六年，縣治在今縣境東北四十里洪江上流四里山一帶。）婁山北麓之桐梓縣，唐為夜郎縣。今綏陽有陳子昂祠，子昂本四川射洪人，以避仇居播州。李白詩云：「夜郎萬里道，西上令人老」，為其長流夜郎時所作。鄭珍莫友芝均謂李白半道放還，未至夜郎。黎庶昌則謂會至夜郎，勾稽典籍以證明之（註三）。憲宗元和十年（八一五）柳宗元與劉禹錫俱出為刺史，一得柳州，一得播州。宗元曰：「播非人所居，夢得有親在堂，不堪遠謫」，言至泣下，因其奏欲以柳州授禹錫而自往播州，會大臣亦以為請，因改連州。此固可見二公友誼之篤，要亦足證唐時貴州高原之荒昧閉塞，猶遠遜嶺南山地也。

（四）楊保前期（白綿堡期）唐之末葉，播州沒於楊保，歷宋元以迄明季，割據一方，儼同異國。楊保為保保之一族，

始居於川黔邊境之赤水河流域，北與敘（宜賓）瀘（瀘縣）爲鄰。僖宗乾符三年（八七六），楊端自西北入居播州，奠首邑於白綿堡。（楊保自稱系出太原，乃漢化以後攀附之辭。）白綿堡一名南白鎮（俗訛作懶板凳）在遵義城南四十里，位於渝筑大道所經之寬谷中，廢城殘壘，今尙可見，此卽楊保故都之所在。唐代播州有羅謝諸族，皆牂牁蠻之著姓，至是隸於楊保之下。譚其驥教授謂西南夷族之大，蓋自漢之夜郎，唐宋之南詔大理以外，無有出其右者，元明之世有思播田楊，兩廣岑黃之語，謂土司之最巨者，實則田岑黃三姓，亦非楊氏之比云。（註四）

（五）楊保中期（穆家川期）南宋孝宗淳熙三年（一一七六），楊軫自白綿堡徙治於穆家川，卽爲今遵義山城所在地（穆家川至明始稱湘江），此期與前期不同之處，在土酋多漸濡漢化，民俗爲之一變。並以設科取士請於朝，許其每歲貢士三人於杭州。再從周舉嘉熙二年（一二三二）進士，號破荒冉家，（冉家爲楊保境內之苗族，二冉故宅在今綏陽縣西南五里平木山。）翌年穆家川始建孔子廟。又有冉璉冉璞兄弟，才兼文武，余玠守蜀，冉氏兄弟爲畫合川釣魚台之策，淳祐四年（一二四四）詔以冉璉權知合州，弟璞通判州事。值蒙古攻蜀，宋室每資傭族士兵以救蜀。元時土酋楊漢英於至元二十三年受封爲宣慰使，會三次入朝北平，濡染漢化甚深，著作斐然可觀，著桃谿內外集六十四卷，極爲時賢如袁桷（清容）輩所推許。其妻田氏亦善讀書。漢英留意文教，蜀中文士來歸者衆，皆量才用之。據此，可知南宋以來，漢人之徙播與楊保之漢化，實互有因果關係。

（六）楊保後期（海龍壘期）明代楊保日以強大，雖承襲播州宣慰使之封號，實爲半獨立之狀態。王陽明先生講學貴陽，當時烏江以北未被其教澤。在經濟上與川省關係較爲密切，蓋川鹽爲民食所必需。遵義出口特產有茶葉（產於金頂山）馬匹楠木等。萬曆元年（一五七三）楊應龍襲封，知川兵脆弱，陰有竊蜀之志。二十五年七月起兵反，破碁江，逼重慶，神宗命李化龍爲總督，以重慶貴陽及湘西沅州三處爲據點，動員二十四萬人，八路進攻，始得克復其地。蜀將劉綎由婁山關進，楊應龍自焚於海龍壘，二十九年（一六〇二）正月頒平播詔於天下。海龍壘在遵義城北四十里，拔海千五百公尺，相對高度三百公尺，四面陡絕，上有平地，循岩壑以築城，因深谷以爲池，卽楊應龍巢穴所在。（山下爲海龍壩，卽湘江支流哪吧水之河谷，清溪中流，松杉競綠，風景清幽，平壩東西長三十里，南北寬僅四五里，引渠灌溉，田疇縱橫，號爲遵義之穀倉。）楊保既平，改土歸流，以播地設遵義平越二府，分屬川黔二省，遵義府設遵義桐梓綏陽仁懷四縣及真安州，平越府設湄潭餘慶甕安三縣及黃平州，於此可見楊保領域之範圍。是役土人戰死者二萬餘，納降者尙有十三萬六千餘名。經二百餘年至清道光年間，遵義境內能操楊保語（保語）者，僅極僻之處尙有數家（註五），今已完全漢化。

(七)老城期 播亂既平，築府城於穆家川，位於湘江西岸，是為老城之起源。城垣規模僅現代老城三分之二，城內且多空地，至乾隆二十五年重修，廣至七里有奇。當時駐軍一萬五千，三分之二以事防守，三分之一以務屯墾。又盡收楊氏莊田入官，招鄰省移民占籍承種。今日遵義名族溯其初，率自彼時著籍，(例如鄭珍其先江西吉水人，七世祖益顯為劉縱部將，從之平播。)熹宗天啓元年(一六二一)川黔邊境之倮族，以永寧(四川敘永)土酋奢崇明為首領，仍有叛變，遵義再陷，殺掠頗多。惟明末流寇之亂，遵義因婁山屏蔽獲全，湘贛鄂蜀人民紛至避亂，經營墾闢，駸駸變為內地。雍正五年(一七二六)以前，烏江為黔蜀二省省界，遵義府原隸四川，故今民俗頗類川風，商賈往來，贛人尤佔多數。遵義改隸之旨，在於補貴州之不足，增本省之財富。清中葉以後遵義經濟上之繁榮，則與絲織業有關。乾隆七年(一七四二)知府陳玉璽(字韞璣山東歷城人)自山東輸入柞蠶種子，並延蠶師織師來遵，教以放養繅織之法。其初試種於老城西側小邱上，春繭大獲，逐漸推廣。遵義四鄉多青岡樹，(一作青杠，其木大而結椽斗者為椽櫟，小而不結椽斗者為青岡，一名櫟樹。)其葉可以飼蠶，自蠶業興起，紡織之聲相聞，櫟林之陰迷道，遵綢之名聞於西南。嘉道年間，歲銷外省之數，足以平衡鹽布之輸入而有餘。清代貴州十二府，富郡有二，曰黎平，曰遵義，黎平以木，遵義以繭。因蠶絲促進地方經濟之富裕，故清中葉以來遵義讀書登科者甲於黔北。

(八)沙灘期 沙灘黎氏為遵郡望族，先世自四川廣安縣遷來，自清乾隆以後，世有賢才，其地在府城東八十里，北距綏陽五十里，東距湄潭七十里。沙灘瀕樂安江，為烏江之支流，中有洲長半里許，因以得名，一稱琴洲。層巒環秀，綠水滌洞，秀木幽篁，四時蒼翠，邑中溪山之勝無以逾此。去沙灘里許，有寺曰禹門，為清初高僧丈雪(四川內江人)所經始，寺負山臨水，飛樓湧殿，頗稱壯觀。寺中有讀書堂，為黎氏家塾。黎恂字雪樓，於嘉慶十九年(一八一四)舉進士，官浙江桐鄉縣知縣，浙省素為人文淵藪，頗廣見聞，嘗曰「人以進士為讀書之終，我以進士為讀書之始」。歸黔後以廉俸萬金，購置書籍。鄭珍(字子尹)以甥行，莫友芝(字子偲)以年家子，(其父與儔字猶人，為遵義府學教授，遂自獨山移家於此，)皆從恂治樸學，其後珍友芝蔚為一時宗匠，號稱西南大師。姪庶昌(字蕙齋)師事會文正公，從事經世之學。鄭莫黎三家，互為婚姻，衡宇相望，流風餘韻，沾溉百年。子尹故居在子午山，曰望山堂，抱道隱居，屢徵不就，學業志行，頗類康成。其治經宗漢，析理尊宋，專精三禮，經術所不能盡者，發為詩古文辭以昌大之，著書十餘種，遵義府志與播雅二書尤為是邦文獻所繫。故沙灘不特為播東名勝，有清中葉曾為一全國知名之文化區。

(九)新城期 元代始闢雲貴驛道，取道湘西，循沅水經貴陽入滇，為今日京滇國道之起源，明初立龍場等九驛以達

蜀，取道水西，蓋自貴陽西北經畢節入川境，清代復增開黔桂交通線。太平天國以前，因黔北交通貿易之進步，遵義市區範圍已擴充至湘江東岸，市肆繁盛，稱為新街。及太平天國敗軍西犯時，新街之規模已相當可觀，故不能不建築城垣，以資防護。新城於咸豐八年（一八五八）落成，與內城屹然對峙，成雙聯市之型式。民國十八年筑渝公路貫穿新城，為新時代之開始。以遵義為中心，北距重慶三八八公里，南距貴陽一六〇公里，且東至思南，西達仁懷，東北接綏陽，東南通瓊安，縣道亦已次第築成。黔北著名之縣市，若大堡（現改德江）永興（屬湄潭）鴨溪（遵義西三十公里）茅台（屬仁懷產高粱酒著名）均隨之繁興，遵義位於十字大道之中心。抗戰軍興，遵義成為後方重鎮之一，新城發展，突飛猛進。民國二十八年又闢公路繞道新城郊外，於是街道又沿公路迅速伸展。北起羅莊，南起南門關，蜿蜒五六公里，蔚為大觀。老城為政治區與住宅區，較大商店皆在新城。戰時人口曾達十萬之衆，在貴州為僅次於貴陽之大城。（戰事結束後，三十五年九月統計，縣城人口七萬二千人，全縣面積六千二百五十平方公里，人口五十八萬八千，每方公里人口密度九十五人。）內遷學府如國立浙江大學陸軍大學步兵學校等羣集於此。浙大輾轉西徙，至民國二十九年春遷至黔北，文工二院設遵義，理農二院設湄潭，一年級設湄潭之永興場。抗戰勝利後一年始遷返杭州，留遵湄凡七年。就遵義出口貨物言，以林牧副產居多，如白木耳（一名銀耳，寄生於青岡樹上，其製法乃清中葉以後由川人傳入者）、五倍子、桐油、漆液、構皮紙、猪鬃、牛羊皮等。鴨溪產名酒，有次茅台之稱。遵義土綢自光緒以還已趨衰落，抗戰時始漸有復蘇之象。本縣劃為山蠶實驗區，中國蠶桑研究所亦遷設新城南郊，從事改良工作。新興機器工業有麵粉絲織酒精（以玉米麥子為原料）等廠。電廠於三十四年始行設立。團溪原以產白木耳著名，位於縣城南四十五公里，循遵義公路可以直達，民國三十年發現錳礦，儲量約十萬噸，抗戰時重慶鋼鐵廠所需之錳，均就近仰給於此，在區域貿易上顯居重要地位。（註六）按遵義地勢南北懸殊，烏江深谷（六百公尺）可生柑橘，婁山頂部（一千七百公尺）鮮見松柏，氣候不同，品物繁庶。今後工業發展之條件為動力與交通，烏江渡附近之烏江水力業經勘測，可發水電七萬匹馬力。（註七）果能應用於農田灌溉，工廠動力及市政設施，自可促進富源之發展。俟川黔鐵道建築完成，遵義介於渝筑之間，左右逢源，自不難成為西南工業重鎮之一。

（註一）王靜如東漢西南夷白狼慕漢歌詩本語譯證。中央研究院歷史語言研究所單刊甲種之八，西夏研究第一輯，民國二十一年。

（註二）勞幹象郡牂牁和夜郎的關係。中央研究院歷史語言研究所集刊外編第三種六同別錄下，民國三十五年一月。

（註三）楊恩元趙愷纂輯續遵義府志（成於民國二十五年）卷七上古蹟，載黎庶昌李白至夜郎考。

(註四) 譚其驤播州楊保考。史地雜誌一卷四期，民國三十年九月國立浙江大學史地系出版。

(註五) 見鄭珍、莫友芝纂輯遵義府志（成於道光二十一年）卷二十風俗篇。

(註六) 團溪錳礦爲國立浙江大學史地系劉之遠君所發現。其地距重慶三百八十里，公路可以直達，且在松坎重慶間有綦江水路可以接運。計全程公路部分一八六公里，水路二八三公里。

(註七) 丁文江川廣鐵路勘測報告。地質專報乙種第四號，民國二十年十一月出版。按揚子江三峽水電廠完成後，遵義亦在其供電範圍之內。